

Visoki predstavnik produžio mandat Komisiji za reformu odbrane

Visoki predstavnik, Paddy Ashdown, danas je produžio mandat Komsije za reformu odbrane i njenog predsjedavajućeg, Jamesa Lochera. Ovo produženje će pomoći BiH da postigne brz i konkretan napredak na provedbi reformi odbrane , kako bi se ispunili uvjeti za članstvo u NATO-vom programu Partnerstvo za mir i kako bi BiH do samita NATO saveza koji će se održati u Istanbulu u junu 2004. godine postala vjerodostojan kandidat za članstvo u tom programu. Svojom odlukom visoki predstavnik je također imenovao general majora Johna Drewienkiewicza kao potpredsjedavajućeg Komisije za reformu odbrane.

Određeni napredak na ispunjavanju uvjeta za članstvo u NATO-vom programu Partnerstvo za mir već je postignut, ali visoki predstavnik je konstatovao da, kada je riječ o uspostavljanju moderne odbrambene strukture na nivou države, parlament i Vlada Federacije nije išla u korak sa parlamentom BiH i sa NSRS. Zakon o odbrani Federacije BiH treba biti usklađen sa državnim Zakonom o odbrani, a takođe novi Zakon o službi u Vojsci treba biti usvojen što je prije moguće.

Objavljujući produženje mandata Komisije visoki predstavnik je naznačio da "Krajnja odgovornost za provedbu preporuka Komisije, naravno, i dalje leži na organima vlasti BiH, ali još uvijek je potrebno obezbijediti pomoć i pratiti dalji napredak".

"Odbrambene strukture u Bosni i Hercegovini su se dramatično promijenile od dana kada je Komisija za reformu odbrane održala svoj prvi sastanak, 4. juna prošle godine—danas u BiH imamo samo jednu odbrambenu strukturu – jedan tim, i jednu bitku", rekao je predsjedavajući Komisije Locher.